

宋文宪公全集

第一函
十一册

宋文憲公全集卷十一
後學四明孫鏘校刊

序三

俞氏宗譜序

俗之不美。有志者鮮也。今世之士論法道不古若。則以無位爲解。及旣得位。卒不能有所爲。豈特無位之罪哉。先王經天下之法深遠矣。大者信非無位之所能行。至於族師閭胥之事。獨不可推行於州里之間乎。州里之間。苟未暇爲。獨不可行於同姓之親乎。爲士者布海內而無救於俗。由是知今之士多無志也。吾嘗損益周制。可以化同姓者。凡月之吉。長少咸會於先祠。拜謁畢。齒坐。命一人庭誦古訓及邦法。誦已長。且賢者繹其義而諷導之。書會者名於冊。再會使互陳其所爲。其行有孝弟忠信者。俾卑且幼者旅拜之。而著於名之下。

有悖戾之行。者命徧拜羣坐之尊者以愧之。而亦著於其名之下。踰月而能改者如初。否則擯不使坐。踰年而不改者斥勿齒。同姓之人。疾相撫。患相拯。貧相贖。死相葬。老弱癯殘者。相養。祭酺相召。昏嫁喪災相助。不能然者。不使與於會。斯數者非甚難爲也。而人咸莫能爲。謂有志者鮮非耶。誠有一人爲之。眾見其善必效之。效者愈多。則所化者必愈遠。因以美天下之俗不難也。惜乎吾未之見也。學於吾者眾矣。吾未嘗不語以其故。金華俞生恂其可語者乎。俞生之先以書詩世其家。擢科第者先後相望。生之父大有尤好學。譜其同姓之親以聯其族。生繼成之。益修其遺文甚完。譜固睦俗之本也。然無法以行之。安能久而無壞乎。欲其久而無壞。舍吾言不可也。吾是以有言焉。嗚呼。恂苟能行之。孰謂有志者之果鮮。

哉。芝園續集

柳氏宗譜序

浦江之柳氏其先居河東。宋高宗南遷時有名鑄者。扈從來江南。遂家浦江之烏蜀山。生一子瀚。瀚生森。彬。森生監。蘊。蘊生崇德。縣主簿。補之。崇德生高郵令元。贈泗州知州。浦江縣男金高郵生四子。其次諱貫。仕元爲翰林待制。以文章名天下。門人私謚爲文肅。有子三人。皆善士。而六孫能守其學。不墜。歿後三十又七年。而介孫穆書其始。徙傳緒之詳。列爲譜圖。持以示濂。濂泣而歎曰。天道於是可徵。而文肅公有後矣。濂少時。幸執弟子役於公門。公之爲人。其崇深閎博者。固非淺見所能知。至其端方直易。厚重嚴慤。怒氣不形於色。惡聲不出諸口。不知古之賢者復何如耳。世之妄議。恆謂賢者言

論足以予奪當世。文章足以挾發至理。所爲與造物者爭強。故天道尤忌之。而多難爲其後。是殆不然。天唯有所不能也。故生賢者出而代之。爲之政以遂天之生。爲之教以輔天之成。爲之文章語言以宣天之道。使善者勉而惡者懼。賢者何負於天。而謂天忌之哉。其不然也明矣。是論也。吾意賢者之子孫而不能自力。姑引天道以自恕。而非其實也。不然。自文肅公觀之。何其異於彼哉。文肅公之傳。今三世。其諸孫盛矣。固可以見天道而未足以盡報賢之意。今諸孫皆有德。積久必愈昌。越十餘世。將有傑然秀出者。興其閒。然後可見天道之全也。斯譜也。君子由是觀天道焉。穆之後人。安可忽哉。同上

張氏譜圖序

張以字爲氏。出於晉之公族。有解張者。其字曰張侯。故晉國

世有張氏。而譜家謂少昊第五子揮爲弓正。賜姓爲張。則非也。子孫蔓延。分適他國。而居清河爲最盛。清河之族布於大江之南。其遷江陰者。則不知始於何世。圖牒喪漫。不可鉤考。至月崖翁始入於譜。翁諱暉。喜聚四庫書。多至充棟。人有願購者。輒乞與之。然博聞強記。或以疑難質焉。則曰。是出於何書。何篇。從容而起。抽架上所有。拂塵而驗之。無差爽者。暉生翊。翊生思明。通天官之學。兼以六物推人休祥。宛然目擊閭右。民有不平之鳴。知思明直而無徇。常微而愬之。思明出片言。理詘者面頸發赤。以去。不敢譁然。尤尙風義。州有過客號材大夫者。必生之。雖至單乏不恤也。市有病氓臥道。周氣奄奄。欲絕。思明昇至於家。召醫調護之。愈乃遣。東甌書生疫死。逆旅中。逆旅氏大怖。不知所爲計。思明具衣冠。藏之淺土。其

後竟得以喪歸。三山梁先生與思明有連。及死無爲主。後者
瑩妻與四女。日夜相持以號。思明爲治喪事。飲食其妻終身。
且悉配其女於士族。君子稱之曰。古有行義之士。今惟吾張
明德乎。明德。思明字也。後爲陰陽學正以終。思明生端。通毛
氏詩。用呂肅公之薦入仕。四爲校官。遷浙西部使者掾。丁元
多故。干戈相尋。丞相康里公承制行事。遂錄其軍功。超授江
浙行樞密院都事。端生宣。宣能辭章。入國朝。以考禮被徵來
南京。尋至史局。與修元史。上親書其名。召至殿庭。卽日擢翰
林。國史院編修官。人以爲異恩。云。時予適長詞林。宣數來請
曰。宣之宗族。遭兵亂之餘。凋落殆盡。所僅存者。唯宣之祖若
父暨宣兄弟爲四人。三世自相師友。漸摩道義。不敢違聖賢
之明訓。邇者先祖又見背矣。痛念世德弗昭。家牒不修。皆無

以示遠爰輯爲一書虛其首簡先生儻異矜之冠以序文實
宣之願也嗚呼三代之前姓氏分而爲二男子稱氏女子稱
姓氏所以別貴賤姓所以別婚姻三代之後姓氏合而爲一
皆所以別婚姻而以地望明貴賤去古爲益遠矣夫姓之與
氏亦昭然易見者獨混淆而無辯況於遷轉之無常承傳之
盛衰又焉能盡知其所自出哉此無他圖譜之局不設中正
之簿狀不存亦已久矣雖有智者出於其後將何徵之耶宜
乎宣之痛心疾首而不能自已也予竊聞之爲善者必有後
宣之家素以善行聞其後將益蕃厯數十世子孫繼修此譜
者屢書不一則指月崖翁爲江陰之初祖造端之功豈非宣
之所爲歟舊譜廼於兵燹有不足恨也或者則曰宇文周之
時嘗命叱羅氏爲張姓今子何所據獨謂此出於晉之張乎

曰此羅之張稍盛於燕代之閒而江南則無有也此非予之私言也蓋亦有所受之也

鑾坡前集

溧水端氏家牒序

惟端氏出於孔門弟子子貢子貢衛人也名賜其姓端木後人以省文獨呼爲端端氏之後有遷居汴者一在曹門一在酸棗門二族甚盛曹門之裔曰某府君者爲里之蕭氏贅壻宋南渡初蕭氏通判昇州府君與之俱寓居烏衣巷中昇州卽金陵爲江南佳麗之地府君之弟四人亦來相依久之蕭遷居溧水之巉山巉山之側有地曰東村府君遂率諸弟定居焉大署其門曰曹門端木氏蓋以自表見也府君生某某生彥彥生進義校尉萬以材雄於鄉統縣兵爲保障盜不敢犯民懷其德爲之立祠進義生省省生壽皆以樂善聞壽生

時中性最嗜學。朝夕沈酣經史。閒發爲辭章。沛如也。時中生
安。不幸早世。安生邦遠。字國用。幼孤。能自振其家。每以澤物
爲務。借貸而不償者。焚其券。如古之寬厚長者。國用生復初。
字以善。精敏通疏。有爲治之才。初由樞府屬連佐大府。遂以
政事聞。復初生四子。曰仁。慷慨有奇氣。亦早卒。曰義。能負荷
家事。弗貽親憂。曰禮。與智。從金華許文懿公。門人游。循循雅
飾。有士君子之行。然而端氏爲溧水大姓。羣從子弟居山東
西前後者。餘百家。高墉飛甍。環數里相接也。至正壬辰。兵燹
方張。咸蕩爲灰燼。雖譜牒之屬。片簡隻削。亦無存者。復初聞
與予言。愀然不自甯。因叩其所記憶者。府君父子之名已逸。
自彥而至復初。凡七傳。皆係世嫡。復初因請予備著於首篇。
而四弟之子若孫尙多。行當蒐采爲圖。以繼其後。至於字某。

娶某氏。壽幾何。葬於某地。亦以所聞附注其下。其無由知者。則闕之。復初之心。可謂至矣。昔者黃文節公譜其世系。僅六七傳而止。其上則闕而不書。蓋不欲失傳信之義也。復初之事。何其有合於文節公哉。嗚呼。譜牒重事也。三世不脩。古者以爲不孝。奈何。世人多忽之。而弗講也。有若復初。殆知本之士也哉。

鑾坡前集

義烏樓氏家乘序

東陽著姓。載於方冊者有八。曰斯。曰畱。曰路。曰駱。曰厲。曰袁。曰苗。而樓居其一焉。樓本姒姓。夏少康之後。周封杞。東樓公支孫以樓爲氏。亦號東樓氏。城陽諸縣有婁鄉。是其地也。氏族家以婁鄉之故。遂謂婁與樓姓同。殊不知婁乃邾婁氏之裔。其姓曰曹。判然不相屬也。漢之季世。樓泰字允恭者。始自

譙郡徙會稽。其子苗。建安中。又自會稽遷烏傷。苗字秀實。生三子。孟曰恭。仲曰侍中元季。曰散騎常侍駿。皆仕於吳。駿生宣威將軍陟。陟生康樂令胤。胤生豐。其下世次不可復知矣。至南齊時。有居烏傷竹山里者。曰靈璨。寄迹釋氏法中。梁武帝賜號曰智者大師。今義烏之智者鄉實因此而得名。其地多樓氏居之。宋南渡後。諱奭府君生二子四孫六曾孫。而元孫之繁。數登於十。其中諱大年者。嘉定癸未進士。通判吉州。大年從子諱子固。嘉熙戊戌進士。嚴州桐廬尉。自是蔚爲衣冠之望宗矣。府君十世孫璉。懼其族大而譜逸也。於是撰爲家乘二卷。一倣司馬遷年表之法。畫而爲圖。字名卒葬。咸具疏之。一輯先世墓誌家傳祭文之屬。而通判君遺詩之僅存者。亦附著焉。與宗人謀將刻諸梓以傳。而請予序之。予知樓

氏之族甚久而宏。若永康若武義若東陽皆自義烏而分。其居縣之東門者尤爲近屬。實同出於秀實之裔。而四明之支則祖秀實之子恭。恭之遠孫宣獻公鑰嘗述高祖先生事略。自謂其先婺人。但不詳徙居之始耳。此皆鑿鑿可信無疑。第智者大師附錄以婁幼瑜乃樓元之裔。而合樓婁爲一音者。似爲氏族家所誤。證諸史傳甚爲不然也。嗚呼。凡言姓氏者皆原於世本公子譜二書。二書則本春秋左氏傳。左氏傳則因生賜姓胙土命氏。及以字以諡以官以邑五者而已。後世得姓受氏者多至三十二類。益淆亂而難明。況襲氏冒姓之不一者乎。無怪乎附錄之不足徵也。今璉也爲斯而懼。惓惓於譜事而不敢忘。亦可謂賢也已。因爲辯析繫諸篇首。使其子孫有考焉。璉字士連。嘗從子學經。國朝洪武壬子試吏部。

中選授將仕佐郎大同府宣甯縣主簿遷成都府仁壽縣云
丁巳秋八月具官金華宋濂序

芝園前集

上虞魏氏世譜序

濂居浙河東嘗聞上虞魏氏爲簪纓大族其先蓋出於唐鄭
國文貞公徵之裔公居鉅鹿生禮部侍郎叔璘侍郎生武進
縣令政始自鉅鹿遷居會稽之山陰武進生邠州錄事參軍
珍參軍生莫州司馬明復白山陰徙居餘姚之蘭風司馬生
石首縣令實實生廬陵尉璘璘生憲憲生章章生克敬克敬
生惟賢惟賢生績績生塤塤生恕恕生和和生傑傑生有聲
有聲生義義生安珦凡厯世一十有二雖不與仕籍而能修
明禮義蔚爲鄉之望宗安珦生宋從政郎良瑞從政生紹興
府學錄亨之復自蘭風徙居上虞之龍山學錄生迪功郎監

婺州東陽縣酒稅震龍監酒生文炳。文炳生壽延。壽延生鎮。此其傳系可見之大略也。初侍郎實生二子。武進與汝陽縣令殷武也。汝陽爲北祖。至四世孫司空暮。遂相宣宗。武進爲南祖。孫子甚多。如上所書之外。而明之鄞。白之臨海。比比有之。而在上虞者爲最盛。一門之內。惇禮樂而說詩書。由是四方才士大夫。慕豔其聲華。無不自遠而至。當其園亭會集。雅歌投壺。酣暢淋漓。閭閻然和洽。亶亶然旅語。或不知夕陽之在樹也。故鄉之論閥閱者。一則曰魏氏。二則曰魏氏云。然而厯代以來。名門右族。若金張。若許史者。蓋亦多矣。未數傳間。或至於殄絕。宗胤卽不絕。亦降於卑隸。有不勝感慨者矣。魏氏自文貞至鎮。已二十又五傳。其遺風餘烈。猶能不廢者。其故何哉。蓋文貞之事唐。立心忠藎。奏疏剴切。凜乎有三代遺

直之風。德厚者其流長。其效固應爾歟。鎮能孳孳弗怠。詳譜其所自出。粲然有條而不紊。豈不誠賢者歟。雖然。氏族之學。尙矣。古者有世卿大宗之法。得以伸其敬宗之義。至於定世系。序昭穆。又有小史以掌之。故其盛衰有徵。而親疏備見也。古法旣廢。唯宰相家得著世系。表於史冊。猶司髣髴見其遺意。若鎮之爲。其亦可謂有所本歟。魏氏之孫子。幸襲藏而續書之。公侯子孫。必復其始。他日焉知無文貞之出者歟。鎮請戶部郎中□□求序其首簡。不揣蕪陋。而備著之。鎮字士圭。有學有文者也。

鑾坡續集

諸暨孝義黃氏族譜序
黃爲嬴姓十四氏之一。出於陸終氏後。受封於黃。今光州定城西十二里。猶有黃國故城。黃旣爲楚所併。子孫散之四方。

以國爲氏。至漢尚書令香居江夏。故世之黃氏咸以江夏爲望。隋開皇間有自江夏遷婺之金華者。其諱曰苾。歷十九傳至榮。生三子。洪。浩。洪生三子。瑕。珙。浩生三子。琛。玘。璞。其子孫析爲五大族。瑕之枝則豐城。珙之枝則剡。琛之枝則監利。玘之枝則分甯。璞之枝則弋陽。皆自金華而遷。稽之金華豐城二譜。及黃庭堅魏了翁李心傳諸儒所采著者。頗同。當可信不誣。諸暨孝義之黃氏實出於珙。珙之季弟玘有子曰瞻。以策干南唐。用爲著作佐郎。知洪之分甯縣。珙與之俱。遂同家縣之雙井。江南兵起。珙之冢子惠自雙井遷於剡。尋從剡遷今所。惠之曾孫宋贈衛尉少卿振仁及於鄉。待之舉火者數十家。其妻仁壽縣君劉氏。斥嫁貲以規義田。均給姻族。故其三子十孫多躋臚仕。而十孫之中。廣西提刑育爲最顯。育之